

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HASBULLAH BIN OSMAN
[GERIK]**

TARIKH : 20 MAC 2019 (RABU)

SOALAN NO. 4

Minta **MENTERI HAL EHWAL EKONOMI** menyatakan :-

- (a) apakah langkah-langkah positif yang diambil oleh Kerajaan untuk merapatkan jurang kemajuan ekonomi di antara bandar dan luar bandar dan sejauh manakah keberhasilan langkah-langkah tersebut dalam meningkatkan pendapatan rakyat diluar bandar; dan
- (b) setakat manakah tahap ketahanan ekonomi negara dalam tempoh 5 tahun akan datang.

JAWAPAN

Tuan Yang di-Pertua,

1. Tonggak III, Kajian Separuh Penggal, Rancangan Malaysia Kesebelas (KSP RMKe-11) memberi perhatian khusus kepada usaha untuk merapatkan jurang pembangunan bandar dan luar bandar. Pelbagai strategi telah dirangka dalam usaha untuk mencapai matlamat ini. Antaranya ialah:
2. Pertama, peruntukan pembangunan diagih secara lebih baik dengan keutamaan kepada enam negeri kurang membangun iaitu Sabah, Sarawak, Kelantan, Terengganu, Kedah dan Perlis. Ini bagi memastikan pertumbuhan yang seimbang antara negeri. Pada tahun 2019, sebanyak RM13.17 bilion atau 42% daripada keseluruhan peruntukan pembangunan diperuntukkan kepada enam negeri ini.
3. Kedua, infrastruktur asas luar bandar akan dipertingkatkan melalui penyediaan rangkaian jalan raya, perluasan akses kepada bekalan air dan elektrik serta penambahbaikan infrastruktur digital.
4. Ketiga, rangkaian hubungan luar bandar dan bandar akan diperkukuh dengan mempertingkatkan ketersambungan dan mobiliti seterusnya mencapai integrasi ekonomi.
5. Keempat, perkhidmatan sosial, seperti kesihatan primer dan perumahan, akan ditambah baik.
6. Kelima, penyertaan sektor swasta dan aktiviti ekonomi tempatan luar bandar akan dipertingkatkan untuk menarik pelaburan, menjana pendapatan serta mewujudkan peluang pekerjaan dan perniagaan.

Tuan Yang Dipertua,

7. Kerajaan yakin langkah-langkah ini akan dapat mengurangkan jurang pendapatan penduduk bandar dan luar bandar kepada 1 nisbah 0.67 pada tahun 2020 berbanding 1 nisbah 0.568 pada tahun 2016. Perancangan Kerajaan ini membabitkan peningkatan peruntukan pembangunan luar bandar bagi Rolling Plan 4 (Tahun 2019) sebanyak 15.4% berbanding jumlah peruntukan pada tahun 2018.

Tuan Yang di-Pertua,

8. Untuk makluman Ahli Yang Berhormat, ekonomi negara akan mempunyai daya tahan yang kuat untuk tahun yang mendatang melalui pelaksanaan strategi-strategi berikut:-
 - a) Memacu produktiviti pada peringkat nasional, sektor dan perusahaan bagi memastikan pertumbuhan yang mampan dan inklusif.
 - b) Menggalakkan pelaburan berkualiti dengan menumpukan kepada pelaburan yang mempunyai nilai tambah yang tinggi, yang menggunakan teknologi tinggi serta yang berintensifkan pengetahuan. Ini sekaligus dapat mewujudkan lebih banyak peluang pekerjaan berkemahiran dengan gaji yang tinggi.
 - c) Melaksanakan inisiatif untuk beralih kepada rantai nilai yang lebih tinggi. Ini termasuklah melalui penumpuan kepada perkhidmatan berintensif pengetahuan dan pemodenan sektor pertanian.
 - d) Mengukuhkan eksport dan mengurus import untuk menambah baik imbalan pembayaran.
 - e) Memberi penekanan kepada langkah pengukuhan fiskal untuk memastikan kemampunan dalam jangka sederhana.

9. Pada masa ini segala inisiatif tersebut sedang giat dilaksanakan oleh Kerajaan. Usaha ini pastinya akan dapat memperkukuh dan meningkatkan daya tahan ekonomi negara.

Sekian, terima kasih.

Kementerian Hal Ehwal Ekonomi
20 Mac 2019